

每週經課朗誦經文(巴克禮台語漢字)2014/03/09

共同經課 - 1

創世記二章十五節~十七節，三章一節~七節

15 耶和華上帝將彼個人下佇伊甸園，來種作顧守。16 耶和華上帝吩咐彼個人講：「園內逐號樹的果子，通隨意來食，17 總是分別好歹的樹，伊的果子毋通食，因為食的日你的確死！」1 耶和華上帝所造山野一切的活物，蛇是比in卡狡譎。蛇對婦仁人講：「上帝豈有影講園內一切的樹恁攏毋通食嗎？」2 婦仁人對蛇講：「園內樹裡的果子阮通食，3 只有園中央彼欖樹的果子，上帝曾講：『恁毋通食伊，亦毋通摸，驚了會死。』」4 蛇對婦仁人講：「恁無的確會死；5 因為上帝知，恁食的日恁的目睷就會開，恁欲親像上帝會分別好歹。」6 婦仁人看彼欖樹好食，亦合目，閣彼欖樹是通欣慕互人有智慧，就挽伊的果子食伊，續互伊的丈夫，伊亦食伊。7 in二人的目睷就開，才知in是褪腹裊，就搨無花果葉為家己做裙。

共同經課 - 2

詩篇三十二篇

1 〔大衛的教示的詩。〕過失得著赦免，罪過得著遮蓋者，這人有福氣！2 耶和華無算伊做有罪，伊的心無奸詐者，這人有福氣！3 我靜靜的時，我的骨頭枯焦。因為我通日大聲哮。4 因為暝日，你的手重重扼我；我的精液，變親像夏天的乾燥。（細拉）5 我對你排列我的罪過，無隱瞞我的罪惡。我講：我欲對耶和華承認我的過失，你就赦免我犯法的罪。（細拉）6 因為按呢，見若虔誠的人佇通尋著你的時著祈禱你；大水氾濫的時，的確袂到伊遐。7 你是我閃匿的所在；你欲庇佑我脫離艱苦，你欲用得救的歌四面圍我。（細拉）8 我欲教示你，指示你應該行的路；我欲注目看你來勸戒你。9 毋通親像馬、騾，in無智識，著用馬咬韁馬勒索約束in；若無，in就毋倚近你。10 歹人受多多苦難；獨獨倚靠耶和華的人欲有慈愛四面圍伊。11 恁義人啊，著因為耶和華來歡喜快樂；心正直的人啊，恁著出歡喜的聲。

共同經課 - 3

羅馬書五章十二節~十九節

12 所以親像罪對一人入世間，死也對罪入；按呢死遍遍到佇眾人，因為眾人曾犯罪。13 因為律法未到的時，罪已經佇世間；獨獨無律法佇啲，罪就無算數。14 總是對亞當到摩西，連許個無犯罪親像亞當犯著禁令的款的，死也攏管轄in。亞當是隨後到者的相對。15 若是罪過不比恩賜，因為若對一人的罪過，眾人死，何況上帝的恩典，及佇耶穌基督一人恩典中的賞賜，充滿佇眾人啊？16 閣對一人的犯罪，也不比恩賜，因為審判是對一人致到定罪，若是恩賜是對多多罪過致到斷做義。17 因為若為著一人的罪過，死就對一人做王，何況許個受恩典及義的賞賜的充滿的，欲對耶穌基督一個佇活的中間做王啊？18 按呢，親像對一擺的罪過，有致到眾人受定罪；就對一擺義的所行，也致到眾人受擬斷得著活。19 因為親像對一人的違逆，互眾人做有罪的；就對一人的順趁，互眾人做有義的，也是按呢。

共同經課 - 4

馬太福音四章一節~十一節

1 彼時，耶穌互聖神導到曠野，欲受魔鬼試。2 已經禁食四十日暝，後來就枵。3 試者倚來給伊講：「你若是上帝的子，就教諸個石變做餅。」4 若是伊應講：「有記載講：人的活，毋若倚靠餅，就是倚靠對上帝的嘴所出攏總的話。」5 魔鬼就導伊到聖城，互伊倚佇殿的尾溜，6 給伊講：「你若是上帝的子，著家己越落去，因為有記載講：伊欲為著你命令伊的天使，in欲用手扶你，免得你的腳觸著石。」7 耶穌給伊講：「閣有記載講：『莫得試主——你的上帝。』」8 魔鬼閣導伊上極高的山，用天下萬國及in的榮光互伊看，9 給伊講：「你若仆落拜我，諸個我攏互你。」10 耶穌就給伊講：「撒但，退去！因為有記載講：著拜主——你的上帝，獨獨服事伊若定。」11 對按呢，魔鬼離開伊，有天使到來伺候伊。